

M 1389
LE

1389
FIDÈLE
POLITIQUE



A PARIS.

M. DC. XLIX.



L E

FIDELE POLITIQUE.



L est vray que les Estats soustenus des meilleures Loix, peuuent entrer dans le butin du temps , parce qu'il ne se plaist pas moins à détruire qu'à edifier, Mais quelques prodigieux que soient les signes qui sont pendus aux Cieux ; ou qui roullent sur la terre comme des presages, & des demonstrations de la decadence des Royaumes, leur conseruation ou leur ruine ne dépend pas tant de l'vnion des planettes , que de la des-vnion des esprits, & des bons ou des mauuais conseils de ceux qui les gouuernent.

A considerer celuy-cy, tout victorieux qu'il est, & qui apres la dépençe d'une longue guerre, ne laisse pas d'estre le plus heureux & le plus florissant de l'Europe. L'on y remarque aussi que le dernier degré de la fortune & de la gloire, est le premier du

A ij

944.03

M475m

No. 1389

817480

malheur, quand par vne negligence affectée, ceux qui ont le pouuoir & l'autorité d'ns a les mains, sont autant de Juges criminels qui enuoyent l'honneur au suplice, & le vice au Triomphe.

La faueur diuine qui semble auoir associé le bonheur, & la victoire aux Armes de France, n'a point assez fait pour sa conseruation & pour sa gloire, si la Police qui a coustume de prendre sujet de quelque notable desordre pour imposer silence, & pour mettre des bornes à la violence des esprits factieux, n'agit comme la cause seconde, en vsant de son autorité pour obtenir en faueur du Trône vne surseance d'armes & d'injures, qu'on refuse au respect qui en est le plus ferme appuy.

Cette insolence ne se coule pas seulement sur la conduite des Ministres, mais sur celle des meilleurs, & des plus sages Princes, & mesme sur nostre grande Princesse, bien qu'elle n'aye rien de son sexe, que ce qu'elle a de merueilleux, & que sa vie aye tousiours esté la mieux réglée & la plus admirable de son temps. Les respects & les venerations qui estoient autrefois le tribut legitime de sa vertu, de sa renommée, & de son integrité, ne sont plus en vsage pour elle, comme si son autorité auoit diminué de son estime, & qu'elle eust moins regné pour l'vtilité du Royaume, que pour perdre les affections du peuple à mesure qu'elle en estoit plus digne. Les tiltres & l'honneur ne sont plus que pour ces esprits tumultueux

rieux, qui décochent impunément les efforts iniurieux de leurs passions contre les suprémes puissances, & qui se plaisent à inuenter contre elles des in-
 médies & des accusations. Qu'il est aussi aduanta-
 geux d'oublier, que nuisible de retenir, puis qu'elles
 ne seruent qu'à alterer les affections entre les Prin-
 ces & les Sujets.

C'est de cette semence de mal-heurs d'où naissent
 les disgraces des Peuples, qui changent le plus sou-
 uent les plus riches Prouinces en deserts, & les plus
 belles Villes en Bourgades, parce que les grands Prin-
 ces ne laissent point à la Iustice ordinaire la con-
 noissance, & le chastiment d'une temerité si inso-
 lente. Ils employent eux-mesmes leur puissance &
 leur force, pour punir l'audace qui blesse l'honneur
 des Roys, & quoy que leur victoire & leur propre
 bon-heur les afflige en tel rencontre, ils aiment
 mieux n'auoir point de Sujets, que d'en auoir d'infideles.

C'est vn bon-heur à vn Estat; quand ceux qui se
 meslent décorire manquent de telle matiere; mais
 rien est vn bien plus grand quand il en reste d'assez
 zelez, & d'assez raisonnables pour détromper ceux
 qui prennent des impressions contraires à leur de-
 uoir, & qui par vne innocence criminelle se rendent
 indignes de l'affection paternelle de leurs Princes,
 qui bien souuent sur de moindres fuiets, se tourne en
 vne haine qui dure autant que leur vie, & qui éter-

nise leur mauuaise fortune. Ce seroit ma ioye si par vn discours plus pressant, & par des raisons plus puissantes, ie pouuois releuer ceux qui tombent dans ces mauuais sentimens; soit en leur faisant connoistre leur aueuglement & leur crime, ou en leur faisant apprehender le chastiment.

Il est aisé à remarquer que toutes ces intelligences viennent de cette source orgueilleuse, qui iette la vanité, & la desobeissance dans les esprits dont les suites reuolent les peuples contre les puissances Souueraines, & leur font changer la crainte en arrogance; de sorte que les Artisans qui à peine sont capables de conduire leurs affaires domestiques, pretendent l'estre de gouverner l'Estat, détouffer les desordres qui y naissent, de ruiner les desseins des ennemis, d'agrandir vn Royaume, d'y establir des meilleures Loix, d'y faire venir l'abondance & les richesses: Et comme ils viuent sans raison, ils se persuadent que la felicité consiste à viure aussi sans peine, & ne considerent pas que la faineantise & loisiuete estans les semences & les ruines du vice, ce seroit le dernier crime qui attireroit sur eux l'ire de Dieu, & la haine des hommes.

Pour dire quelque chose de particulier, oseray- ie bien me mettre au milieu de cette foule importune de peuple, à qui la plus grande ville de l'Vniuers deuiant tous les iours plus étroite, à mesure qu'elle deuiant plus grande. Quoy cette Reyne de toutes les

Citez qui sembloit n'estre bastie que pour seruir de lustre, d'éclat & de soustien au Royaume, n'emploira-elle ses forces que pour y ietter de la confusion en prenant les armes pour des causes mal entendues & mal interpretées, que luy reuiendra-il d'auoir allumé vn feu qui peut estre la consommera elle-mesme. Les Prouinces & les autres villes l'accuseront d'auoir ruiné ses Compatriotes pour se vanger d'un Ministre plus digne de loüange que de blasme, & d'auoir éloigné la Paix; dont elle-mesme estoit sur le point de goûster les douceurs. Renouueller telles pratiques, se feroit en verité fauoriser le dessein de l'Ennemy, & détruire le nostre, effacer les tableaux, & perdre toutes les Prouinces, toutes les Riuieres, & toutes les Villes, qui sont autant de marques des victoires ou le plus noble sang des François a esté épanché, & pour lesquelles tant de finâces ont esté employées. Cependant il semble que nous soyons sur le point d'en vser, comme le lezard qui efface de sa queue les impressions de son passage; afin d'oster à la posterité la connoissance de nostre gloire.

Les illustres & venerables personnes qui composent cét Auguste Senat, dont il semble que le Chef soit diuinement inspiré; ont veritablement eu des sentimens dignes de leur conduite, & de leur profession en se sentant toucher des miseres publiques; Mais comme au milieu de la guerre, il est difficile de retrancher les reuenus d'un Estat, qui à peine suffi-

sent pour la maintenir, sans diminuer la dépence, ou trouver du déchet dans les progrès, ou dans les victoires, & n'y ayant que la nécessité ou la force qui puisse porter l'Ennemy à la Paix, ne continuer pas les attaques avec vne égale vigueur, c'est luy monstrier vne lassitude, & étouffer la pensée qu'il auoit d'en venir à vn accommodement. De sorte que l'on eust tiré plus dauantage, de gloire & d'utilité de supporter encore quelques années les mesmes impositions pour entretenir les mesmes forces, avec lesquelles ils auoient tant de fois vaincu, puis qu'il estoit évident que la Paix generale deuoit estre en bref la recompense de leurs travaux, & la guerison parfaite de leurs necessitez.

Ie ne m'estonne pas pourtant que la Reyne par sa bonté ordinaire aye dechargé le Peuple d'vne somme si considerable, que celle dont sa Majesté luy a fait remise, mais ie ne puis conceuoir pourquoy cette faueur luy a esté si peu sensible, qu'elle ne se trouue pas capable d'arrester le tumulte, & d'esteindre les seditions qu'il semble qu'on veuille faire renaistre sur de nouveaux pretextes, qui font clairement voir que le desir de pis faire manque bien moins que le pouuoir.

Avec trop de raison, le Peuple attend la conclusion de la paix, c'est ou consiste la seureté de sa vie, de ses biens & de son repos, mais elle ne dépend pas toujours du vainqueur. Il ne faut point accuser les Ministres d'en auoir éloigné le Traité, nous auons veu des

gen

gens assez attachez au mal-heur, pour ne vouloir point de quartier, quoy qu'ils fussent sans armes & sans resistance, & si l'ennemy prefere la perte de la reputation de ses armes, à celle de ses Estats & de ses suiets la meilleure resolution qu'on puisse prendre, c'est celle de luy oster le pouuoir de nous nuire, ce que l'on fera aisement si l'on garde autant de constance pour le vaincre, qu'il a d'opiniastreté pour se perdre, & que l'on ne trouble point par des changemens & des diuisions le bon estat des affaires; C'est vne armonie doublement necessaire & infiniment precieuse, en ce que la reputation de la Couronne en depend, aussi bien que l'affection des ses alliez qui iusque à present luy ont presté la main pour s'opposer coniointement aux efforts de leurs ennemis communs, sans auoir témoigné aucune impatience, ny aucun refroidissement dans les diuers euenemens & les differens succez qui ont suiuy nos desseins depuis la declaration de la Guerre bien que nous puissions iuger de leurs depences par les nostres, & de leur zelle par les ruynes qui pareissent en leurs Estats comme des marques d'une fidelité que le pillage & le feu n'ont peu ébranler.

I'auoüe que la richesse de ceux qui gouernent est vne marque de la necessité publique: C'est de l'estat de leur fortune que l'on tire vne consequence infallible de leur inclination, & ce qui

semble seruir a leur sureté les met souuent dans le hazard ; Le peuple de qui la connoissance va plus loin qu'on ne pense étudie leur conduite & iuge de leur auarice, où de leur liberalité par les profusions, par les depences, où par les épargnes qu'ils font. Ainsi leurs actions ont cela de commun avec celle des particuliers, qu'elles sont sujettes à la sensure de ceux que la connoissance où la raison oblige à la regarder comme faisant leur bonne ou leur mauuaile fortune ; ce qui leur est de plus nuisible sont les charmes des mauuaises impressions que l'enuie inspire à certaines gens a qui l'eclat & la vertu des grands esprits ébloiit tousiours les yeux ; Ils medisent impunément de leur conduite, ils blasment toutes leurs actions & rendent leurs plus fideles seruices suspects, comme s'ils les auoyent pour ennemis à cause qu'ils sont au dessus d'eux, & il semble que la haine publique soit attachée à celuy qui a l'administration du Royaume, comme s'il estoit aussi chargé de crimes que d'affaires ; L'on les accuse d'ordinaire d'infidelité enuers l'Estat, d'inhumanité enuers le peuple & de mille autres crimes, les vns vsurpent l'autorité Royale les autres dissipent ou enleuent les finances. En sorte qu'à s'arrester à l'opinion comune, il faudroit commettre tous les iours vn peché d'Estat, en déposant contre toute la Politique & la prudence, des princi-

paux, & des plus clairs voyans Ministres.

Il est vray qu'on a tousiours facilité à décrier les actions & la conduite de ceux qui gouvernent les affaires publiques, il ne faut pas estre fort ingenieux pour les rendre odieux au peuple, qui n'estant iamais bien informé de ce qui se passe, ne voit rien plus aisement que ce qui ruine la reputation de ceux, que l'interest plustost que la raison leur fait tenir suspects; La plus pluspart des hommes par vne malice naturelle qui se saisit de leurs esprits regardent d'ordinaire avec ialousie le bon-heur mesme de leurs plus proches, & se figurant que les choses ne sont bien conduites que quand elles sont conformes à leurs sentimens, mettent dans les desordres publics & les crimes d'Estat, tout ce qui n'est pas fauorable à leurs interests particuliers: quelques-vns se peuuent encore souuenir des plaintes que l'on fit pendant la Regence de la feuë Reyne Mere, contre ceux qui tenoient les premiers rangs dans le Conseil.

Le plus grand crime de Monsieur le Cardinal Mazarin est de n'estre pas François, mais ce n'estoit pas allez a son predecesseur de l'estre pour meriter ces eminent degré d'honneur

Il ne falloit pas manquer a imposer des bornes aux efforts impetueux de la Mer pour prendre la Rochelle, ny a secourir heureusement Casal, où chacun sçait qu'il ne fit pas le coup plus impor-

tant : si iamais homme n'a fait de si grandes choses, iamais aucun n'a receu de plus grandes tra-
 uerses pour se maintenir. En effet par vn mal-heur
 commun à tous ceux qui gouernent, c'est vsur-
 per la reputation que de ne la pas établir par des
 miracles, ou par des effets extraordinaires qui
 ferment la bouche à l'enuie & qui imposent silen-
 ce à la rebellion. Et bien que son esprit ait esté
 d'une trampe toute particuliere, son credit a esté
 établi par de moindres victoires que celles qu'on
 a obtenuës de puis six ans, que sa conduite a
 manqué à la France. La generosité de nos Princes
 a gaigné plus de batailles, forcé plus de villes,
 & porté les armes plus auant qu'elle n'auoient
 esté du temps de son Ministère.

De sorte que ce ne peut estre ny la crainte de
 l'ennemy ny le mauuais Estat des affaires, qui
 oblige le peuple à se plaindre, & à décrier la con-
 duite de celuy qui en decrient le gouuernail.

Le bon-heur qui accompagne les armes du
 Roy, n'a point esté interrompu depuis qu'il en
 prend soin : ainsi sa vigilance & sa fidelité n'ont
 point esté en deffaut, non plus que ses intelligen-
 ces secretes qui sont les vrais ressorts pour ou-
 urir l'entrée des cabinets, & qui sont autant de
 reuelations des conseils les plus cachez des enne-
 mis, qui font eschoüer leurs desseins aussi tost
 qu'ils les ont resolus, & qui le plus souuent sans
 hazard.

hazarder des batailles ruinent des armées entieres.
 Enfin ses actions parlent si glorieusement de sa
 conduite: que ie croy inutiles le temps & les pa-
 roles que j'employe à figurer les auantages que
 la France en reçoit, puis que chacun sçait que
 pour n'estre pas né François, il ne laisse pas d'a-
 uoir toute les affections du plus passionné suiet
 de sa Majesté: n'ayant point degeneré de ses bra-
 ues & illustres Romains, dont il tire son origine;
 qui par leurs conseils & leur generosité ayderent
 à Cesar, a faire plier vne partie de la terre & tram-
 bler l'autre.

Mais pour bien expliquer les secrettes inten-
 tions de ses esprits broüillons, inuenteurs de nou-
 uelles pratiques qui tendent à la ruine de l'Estat,
 & qui essayent sous des mauuais pretextes de cor-
 rompre les plus attachez a l'obeissance pour ap-
 puyer leurs mauuais desseins, & les entresner par
 les mesmes crimes dans les mesmes malheurs au
 grand desauantage du repos public & des affaires
 generales, il faut en venir à vn éclaircissement de
 leur pernicious dessein. Il semble quoy qu'ils en
 disent, qu'il ne tend pas si fort à la destruction de
 l'honneur & de la fortune de Monsieur le Cardinal
 qu'à troubler le Royaume, à obliger le Roy au
 premier essay de ses armes contre ses propres su-
 jets, & a mettre la main à l'espée, quoy qu'elle ne
 soit encore capable de porter que des fleurs & de

tenir des liures; Comme si l'on vouloit contraindre sa Maiesté à faire vn effort pour entrer en son heritage, & iouyr d'une Couronne qui luy est acquise il y a plus de 1500. ans tres legitiment, ie ne dis pas cecy pour iustifier ceux qui ne sont coupables que par la haine qu'on leur porte, mais pour appliquer le remede à l'origine du mal, les vertus & la naissance de telles personnes, les affranchissent assez de la crainte & du chastiment.

Ie sçay qu'aux choses qui importent au bien public, on ne doit parler qu'avec vn langage & des raisons communes à tout le monde. Ainsi ie pourray estre excusé si la Politesse ne paroist point en ce discours, où ie n'ay autre intention que d'vser de termes simples & naïfs pour représenter la verité dans son naturel. Mais ie ne le pourrois pas estre si par vn stil & des raisons tirées du texte sacré. Ie n'y adioustois que Dieu qui na iamais rien fait que de iuste, a tousiours moins puny ceux qui se rebelloient contre luy. Que ceux qui se reuoltoient contre leurs Princes, parce qu'ils faisoient la desolation de tout son Peuple, & quoy qu'il fist distinction des coupables, & qu'il ne voulust que faire tomber sur eux le malheur qu'il destinoit à leur punition; il en faisoit neantmoins voir les presages à tout l'Vniuers, ces prodiges tiroient à la verité quelque estonnement de leurs foiblesses, mais point de repentir ny de larmes. Si-tost que

ces objets qui les auoient fait passer de crainte paroïssent à leurs yeux, ils ne les considéroient plus que quand ils voyoient que leurs moindres effets depeuploient des Prouinces, & faisoient choquer des puissances qui pour se mieux destruire employoient toutes leurs forces & leur industrie afin d'accroistre leur confusion. Telles desolations estans d'ordinaire les fruits de la desobeïssance & de l'opiniastrété, ie souhaite avec tous les bons François, que de meilleures impressions succedent à celles qui paroissent & que nous cessions de trauailler à nostre ruïne avec nos propres mains.

I. B.

